



Den union nos ta selebrá kosecha!
Ban wap'é!

Guion

- Minister
- Grupo di trabou
- Baluart
- É Kantadó Mayó
- Reina di kosecha
- Wela seú
- Taskforce seú
- Gruponan
- Spònsernan

Minister Sithree van Heydoorn

Minister di Enseñansa, Siensia, Kultura i Deporte di Kòrsou

Ku gran orguyo i gratitut mi ta dirigí e palabranan akí na pueblo di Kòrsou kompletu i di manera spesial na tur esnan ku aktivamente a kontribuí pa preservá, ekspresá i selebrá “Fiesta di Kosecha” komo un di nos rikesanan kultural.

E selebrashon di nos dushi Seú, Fiesta di Kosecha, ta hopi mas ku un desfile kolorido i folklórico. E ta un homenaje bibu na nos historia, nos herensia i nos pueblo. Seú ta un pilar kultural ku ta uni nos, fortalecé nos den un forma kreativo i sosial pa finalmente alimentá nos identidat nashonal i patriotismo.

Mi ta sumamente agradecido na tur aktor den e sektor kultural i na kada siudadano ku kada aña, ku amor i entrega, ta pone man pa sigui tene e tradishon aki bibu. Danki na boso pashon i dedikashon, nos kultura no ta keda solamente un kos di pasado, sino un forza bibu den nos presente.

Di e manera akí tambe, mi ke ekspresá mi gratitut i admirashon na e lidernan di grupo, músikonan i tur organisashon i persona ku a traha duru pa realisá un periodo di Seú eksitoso.

Boso trabou duru, i ku perseveransha nos a logra huntu un desfile ku no solamente ta bai ta impreshonante visualmente, sino ku lo toka e kurason i alma di nos pueblo



Minister Sithree van Heydoorn

Un danki tambe na tur spònsa, ku di un manera òf otro forma sea ku material òf di forma finansiero, a aportá pa hasi e selebrashon akí posibel. Boso ta demostrá un gran sintimentu di kompromiso sosial ku nos komunidat. Esaki ta algu hopi balioso i digne di apresio.

Finalmente, danki di kurason na e Ministerio di Enseñansa, Siensia, Kultura i Deporte (ESKD) huntu ku “Taskforce Seú 2025” pa nan entrega, pasenshi i trabou dediká pa logra un periodo di fiesta di kosecha eksitoso. Boso dedikashon sin duda ta meresé un gran aplouso.

Laga nos sigui traha huntu riba nos futuro, honrando nos pasado. Seú ta bibu den nos tur su kurason, den nos baile, den nos músika i den e komunidat ku nos ta forma huntu. Den union nos ta selebrá i kosechá, Ban Wap'é!

Ku gratitut,

Sythree van Heydoorn

Minister di Enseñansa, Siensia, Kultura i Deporte



Taskforce Stuurgroep

Minister di ESKD Sithree van Heydoorn, sr. Lawrence Pieters,
Direktor di Sektor di Kultura i Deporte sra. Lizette Sambo-
Velder, sra. Irelnety Copra.

Taskforce Werkgroep:

Presidente: sr. Erickson Vicario:

Representashon di gruponan: sr. Ludgene Balentien i sra.
Monique Gibson;

Representando gruponan kultural, sr. Ludwig Isabella;

Maneho finansiero: sra. Schaidea Berenstein;

Sektor di Kultura i Deporte: sra. Sue Ellen Cijntje i sra. Jessica
Damon;

Sponsoring: sr. Curtley Valeriaan

Konop'é, Mar'é, BC-Pro Foundation, sr. Raychel Sambo,

Reina Kosecha: Curaçao Cultural Development Foundation,
sr. Eugene Goedgedrag,

E Kantadó Mayó, Bold Star Heinrich Pieter;

Marchanan, Fundashon Grupo JAG, sr. Hubert Aniceta

Asistente di Taskforce sra. Lisette Jansen



Baluarte

Sra. Judith Mauris a nase na Kòrsou riba 11 novèmber 1944.

Judith a bishitá Sta Ana School i finalmente a terminá su Mulo na Maria College. Judith a laborá na diferente empresa pero loke a fasin'é mas tabata e oportunidat ku el a haña di traha komo ayudante di taksista serka su propio tata durante un periodo di 6 luna.

Judith a bira e promé hende muhé na Kòrsou ku a risibí pèrmit di transporte públiko pa kore un Taksi; Taksi 167. Tambe e tabata e promé dama ku a logra pa lanta un sindikto pa taksistanan.

Den Judith su trabou komo taksista e tabata ripará, ku 2 dia di Pasku Grandi, Sentro di Siudat tabata ketu, no tabatin nada di aktividat. Barkunan di turista ta bini, pero no tin nada. Judith a disidí di traha un grupo di 40 hende ku a konsistí di mucha i grandi pa siña turistanan baila Seú. Nan tabata yama e grupo, Grupo di Judith di taksi. Asina Judith tabata invitá e turistanan, yena nan den taksi pa bai wak Seú na Band'abou, na kas di defuntunan Frida Vrutaal, Dudu Muzo, i mas.

Judith a yuda krese e fiesta di Seú den barionan i a disidí pa hasi esfuerso pa trese e SEÚ PUNDA. Tabata un periodo largu di preparashon.

Asina tur kos a kumisá.....i na aña 1973, ku partisipashon di 16 grupo, saliendo for di Aqualectra i finalisá na Holiday beach di e tempu ei e promé marcha na punda a ranka sali.

E partisipashon a kumisá bira mas grandi i Judith a aserká Servisio di Enseñansa i Kultura di e tempu ei ku a sosten'é e fiesta di Seú engrande tambe nan a yuda pa inkorporá aserka e produktonan di Mara Lensu, Reina i Kantado Mayó; i asina a keda te ku dia di awe.

Judith Felisia Mauris ta kargadó di Krus di Mérito otorgá pa Gobièrnu di Kòrsou na aña 2023.

Task Force di SEÚ 2025 ta rekonosé Judith Mauris komo nos baluarte di Seú 2025 i ta gradisí Judith na nòmber di Pueblo di Kòrsou!

Danki Judith Mauris pa pone fundeshi sólido pa e Seú di Willemstad pa mas ku 50 aña.






Sharrel Adjatay Denisia

KARGADÓ

Kompositor: Furgell Wijngaarde
& Elia Isenia
Areglista: Royston Hato



KARGADÓ

Hopi n'sa, e bestia di mas fiel ta burik'i kunuku. **Koro: Hopi unsa 3x**
En tin sombré di rei pero e ta yuda sin kansa
Animal di rasa puru pionero 'i kunuku
Den historia bíbliko mama di Kristu el a karga

Kargadó, mir'é ta bin ayá
Tralalá na kustia
Stiwá ku maishi
Kargadó di kosecha
Kargadó kargadó mi tei duna bo balor

Koro: Kargadó 4x

**Koro: Kargadó kargadó
mi tei duna bo balor**

Un animal ku pata di historia
Vehíkulo di pueblo pa hiba kuminda magazina.
E konosé tur seru i kaminda di kabritu
Un bestia bendishoná ku masha poko ta sosegá. **Koro: Tin un dicho
ta bisa, buriku ta
tra pa kabai por
kome**

Mundu su peso ta riba dje
Nos tambe a konosé.
Den tur kunuku ta'tin un
Maltrata o bon kuida
Tòg en keda balorá manera mester ta.

**Koro: Den awaseru
i mal tempu el a
sigui pèrseverá!**

**Awe nos tei balor'é
Ku kanto i músika**

**Koro: 'na mi un chèn
pa baloré**

**Te dilante den seú.
Kargadó kargadó mi tei duna bo balor**

**Koro: Kargadó luchadó
awe mi tei n'abo bo
balor**

**Hopi n'sa, animal di rasa puru pioner'i kunuku
Den historia bibliko mama di Kristu el a karga
Kargadó, mir'é ta bin ayá**

Koro: Kargadó

**Tralalá na kustia
Stiwá ku maishi
Kargadó di kosecha
Tin ku a lubid'é
Hopi n' balor'é
Nunka entrega
Sigui perseverá
Ate ku su doño
Ku bleki di awa
Karg'i maishi
Riba su Lomba
No tin un kaminda
Ku kabai ta bai
No tin un kaminda
Ku buriku tambe por yega**



**Anto si e bestia desviá bai mondi
Ta bo ta su doño ta bo bestia tah'é
Pa niun kashá di wabi bèrdè raspa nos
P'e no dal su pia dos bia den baranka**

**Koro: Nos tin ku
tahe! 4x**

**Djakibanda
Djayabanda 2x**

Koro: Ha!

**Kargadó, mir'é ta bin ayá
Tralalá na kustia
Stiwá ku maishi
Kargadó di kosecha
Pata di historia
Ku hopi a lubidá
Pata di historia
Ku mester wòrdu balorá**

Koro: Kargadó

**Anto si e bestia desviá
Ta bo ta su doño ta bo bestia tahé
Pa niun kasha di wabi berde raspa nos
P'e no dal su pia dos bia den baranka**

Koro: Nos tin ku tahé! 4x

**Djakibanda
Djayabanda 2x**

Koro: Ha!

**Den historia bíbliko mama di Kristu el a karga
Kargado, mir'é ta bin aya**

Koro: Kargado, ha, kargado!

Reina di kosecha

Reina Kosecha 2025:
Narián Martina

Promé Finalista:
Ishaina Girigorie

Segundo Finalista:
Quishantely Minguel



Wela seu

Enith Nicastia

1 e fina lista wela seu

Lelya Pedro

2 e fin wela seu

Sandra

3 e wela seu

Rustica de Palm .



Palabra di Presidente Taskforce 2025

Ta ku gran gratitut i orguyo mi ta mira dilanti awe, den e selebrashon kolorido, kultural i bibu ku ta e Parada di SEÚ 2025.

SEÚ no ta simplemente un evento folkloriko. SEU ta nos historia, nos kultura, i nos identidad. Awe, nos ta selebrá e bida ku nos antepasadonan a laga pa nos, e trabou ku nan a hasi ku man i kurason, i e union ku SEU a sigui simbolisá pa generashon tras di generashon.

Na tur e 35 gruponan di SEÚ 2025, Danki pa boso esfuerzo, perseveransha i union pa logra pone boso grupo riba pia awe. Sea ta ku 35 of ku 350 miembro. Boso motivashon balentia i kurashi a yuda krese e Fiesta di SEÚ 2025

Danki na tur e sostenedónan di nos SEÚ, nos spònsernan ku ta kere den e produkto SEÚ.

Komo Presidente di e Task Force SEÚ 2025, mi kier a yama danki na henter e tim ku a aseptá e reto pa sostené SEU 2025, kada reto ku a presentá nos a sòru di atendé esakinan ku tur honor i dignidat. Danki di kurason .

Kultura ta e simia di pueblo,
ku ta krese den brisa, den solo i den awaseru
I boso kada unu a keda yena e simia ku fe i ku amor.

Boso a lanta SEÚ manera un bandera,
ku no a kibra, no a kansa, ni no a pèrdè koló.
Un pueblo ku sa di unda e ta bini, por skibi su propio futuro.
Esaki ta loke SEÚ ta sigui inspirá den henter nos komunitat.


Na boso tur: mi palabranan di gratitut boso ta e pulso di nos kultura.

Kada paso, kada bailá, kada sonrisa riba e ruta di parada ta un deklarashon:

"Nos ta Kòrsou, kargadónan di nos Kultura."

Felis Parada di SEÚ 2025,
i hopi bendishon pa boso tur.

Palabra di Presidente Taskforce SEÚ
Sr. Erickson Vicario



NUMERASHON GRUPONAN MARCHA SEÚ

#	GRUPO	MÚSIKA
1	HAK	HAK den ambiente
2	Protokòl	Dj Argenis Huerta
3	Dushi Tamarein	Den Chiki
4	Un Pinchi un galon	Grupo Tinashi
5	Grupo Kosecha di Kòmkòmber Chiki	Ekolekua
6 A 6 B	Grupo Sembra Alegria Grupo Simia di Alegria	Dj Bradley
7	HOPOSEPA	DJ Raynys
8	Grupo Kokolishi	DJ Blanken
9	Den Kosecha pa Futuro	Quality Sound
10	Wapa Ambiente	Hoben na Timon
11	Si no yobe lo pinga	DJ Regalado
12	Flornan di Futuro	DJ Best Sound
13	Grupo Serekobi	Serekobi
14 A 14 B	E Diferensia di Kunuku E Diferensia di Kunukito	Bena Mayó ONE Flavaz Kultural

#	GRUPO	MÚSIKA
15 A 15 B	Mi Grupo Mi Grupo hubenil	Escape Band
16 A 16 B 16 C	Zewelo Zeula Danki p'e fabor Trank'e datu	Grupo Kòmper
17 A 17 B	Grupo Tamarein uní Hardin Hubenil	Grupo Rítmiko Tamarein
18 A 18 B	Grupo Papon Grupo awe pa mañan	DJ Melo Djembe
19	Union Karapalida	ORIRI
20 A 20 B	Azalea E truinfo di sablika	Yawalu Grupo Rítmiko Sablika
21	Grupo Labizjan	Caramileño
22	Grupo Wapa pa nos bai	Los Paranderos
23	Paniweri	JC & Friends
24	Grupo Kibrahacha	DJ Calito
25	Amor pa nos kosecha	Daiquiri Band
26 A 26 B	Grupo He Chu Chu Grupo He Chu Chu VIP	GRIK Tribu

Nòmber di Grupo: Grupo Seú HAK (Hóbennan Aktivo i Kreativo)
Lider di Grupo : Giovanni Ignacia I Misjenou Romano
Kantidat di Partisipante: Adulto 49
 Mucha 10
Músika :
 HAK den Ambiente (Grupo na Pia)

Deskripshon di Trahe marcha di Seú 2025.

Tema: Konservá- i/o preservashon di nos yerba-, mata- i palunan medisinal

Riba nos dushi pais, nos tin hopi sorto di yerba-, mata- i palunan ku a nase i forma nos flora, di kual esnan kurativo tambe, ku a- i ta forma parti ketu bai di nos pais i su vegetashon. Bon mirá, den tempu di nos avochinan, tabatin hopi kurandero-, yerbero- i kuriosonan ku tabata hasi nan práktikanan di kura- i sanashon ku yerbanan medisinal.

Trahe: Damas Nos damanan ta bistí na e trahe folklórico popular di Kòrsou ku ta e saya ku djèki. Telanan ku a wòrdu usá ta: tela floriá di kolónan maron, blou bèrdè, oraño i blou kla. Saká ku pruga, oraño i blou bèrdè. Na pia, nan tin alpargata oraño bistí. Den man nan tin makutu yená ku nos kosechanan. Riba kabes lensu mará kargando nòmber / dicho di nos antepasadonan. Lensu/Lema: Mas bal un 'Kleinfeshi' den bo tayó, k'un kapitan den tayó di otro. Nifikashon: Si nos esfuerso no tabata suficiente pa nos por a alkansá mas, nos lo keda kontentu ku loke ta nos kosecha.

Trahe: Kabayero, Nos kabayeronan tin kamisa ku manga i karson saká ku e mesun kolónan ku e damanan i ku nan faha di lomba manera nos grandi nan tabata bisti ántes ora di trabou, kombiná ku nan dashi. Riba nan kabes nan tin sombré di kabana, den mannan chikoti/garoti di pal'i kibrahacha i òf brasia i na nan pia alpargata, (koló)

Grupo ta wòrdu kompañá pa su miembronan i na pia: H.A.K den Ambiente.

Nòmber di Grupo:	Grupo Dushi Tamarein
Lider di Grupo :	Lilian Caciano
Kantidat di Partisipante:	Adulto 60
	Mucha 14
Músika :	Den chikí

Deskripshon di Trahe marcha di Seú 2025.

Tema: Dushi Tamarein ta selebrá, Hesta un fiesta di ko' maishi.

Trahe di hende muhé ta saya ku djèki estilo trahe folklórico.

Trahe di hende hòmbler ta ilustrá trahe ku nan ta traha den kunuku i ku un toke festivo.


Nos a usa tela koló oraño, hel i tela diseño afrikano. E kolorido di e trahe ta representá e alegre ku nos ta, di ta selebrá e fiesta di kosecha di maishi.

Sombré blanku: Ku e rant di koló na dje.

Lensu: E tapushi na e lensu ta representá e kosecha di maishi.

Den man di hende hòmbler: Tapushi ku su stèngel.

Riba e pista nos ta ilustrá kon ta prosesá e maishi i tambe trese e kumindanan ku por saka for di maishi.



Nòmber di Grupo:	Grupo Un Pinchi un Galon
Lider di Grupo :	Sylvia Wilson-Clarke
Kantidat di Partisipante:	Adulto 50
	Mucha 15
Músika :	Grupo Tinashi

Deskripshon di Trahe marcha di Seú 2025.

Tema: Grupo ta presentá e fruta Parchita

Su orígen ta di Sur-Amerika i e ta bini den e kolónan hel, kòrá i lila. Na ingles e fruta ta haña nòmber di “Passion Fruit” dpa motibu ku su flornan ku ta paresido ku e “E pashon di Hesu Kristu”.

E fruta tin hopi vitaminanan manera A, C fibra i antioksidante. Parchita ta “boost” nos sistema imunológiko protehá nos sèlnan, redusí kolesteròl, e ta bon pa nos kurason i e ta bon pa hendenan Diabétiko.

na sa traha djus di parchita, djèm di Parchita, Joghurt di parchita i tambe nos bartèndernan ta traha mocktails di Parchita.

Nos Trahe

Nos bistí tin e koló hel di e parchita, e pretu ku ta e pipita di e parchita. E tela floria tin tur e kolónan di e parchitanan i e alegria ku tin den nos grupo.

nòmber di nos lensu ta **“Den Alegria ku Parchita”**.

e lensu ta di pruga saka ku tur e kolónan di e fruta i un makutu ku e fruta di parchita riba dje.

E kadena i renchi ta traha pa nos Kiona Albertus

Deseñadó : Bernadita Geerman i Kiona Albertus

Kosedónan: Bernadita Geerman, Ruthline Statius. Naida Janga i Martisa Sambo

Nòmber di Grupo:	Grupo Kosecha di kòmkòmber chikí
Lider di Grupo :	Najet Lourens
Kantidat di Partisipante:	Adulto 20
	Mucha 40
Músika :	Grupo Ékolekuá

Deskripshon di Trahe marcha di Seú 2025.

Tema : ban kompartí loke tera a duna nos pa asina nos por planta i kosecha esaki na abundansia.

Un di e kosecha nan ku sigur e aña akí Kòrsou por a papia di dje ta Kòmkòmber chikí. Kòmkòmber chikí ta keda usá pa nos kome stobá agregando karni stobá, rabu, karni-sá asina krea un delisioso kuminda ku esaki. Esaki nos por mira tambe den e makutu ku kada miembro tin huntu ku nan trahe kual nan ta ofresé na e pueblo ku ta para ta mira e marcha ku e mensahe pa nos ban planta esaki di manera ku sigur pa otro aña nos por tin un kosecha na abundansia. Nan ta bisa “pipita di kònkòmber na boka di mucha ta hende grandi a poné”.

Ku e mensahe akí nos ke motivá nos pueblo pa ban sigui ku e tradishon di nos grandi nan pa ban sigui planta.

Trahe damas: nos hende i mucha muhé nan su bistí ta un saya ku djèki. E tela nan ku ta wòrdu uzá ta un kombinashon di un tela ros fuksia i ros kla bruá ku krèm, saká ku koló blanku. Na pia un alpargata blanku i riba kabes un lensu blanku ku na su rant e mesun koló ku e tela di nan trahe. Den nan man un makutu ku loke nos grupo a kosechá e aña akí ku ta e kònkòmber chikí. Trahe kabayero: nos hende hòmber nan tin kamisa ku manga i karson saká ku mesun koló ku e dama ku un faha koló blanku. Na nan pia alpargata koló blanku.

Nòmber di Grupo:	Grupo Sembra Alegria
Lider di Grupo :	Viviana Braafhart
Kantidat di Partisipante:	Adulto 75
	Mucha 18
Músika :	DJ Bradley

Deskripshon di Trahe marcha di Seú 2025.

Tema: Aña pasá nos a karg'é, e aña akí nos ta selebr'é. Paso ta fiesta tin!

embra Alegria i Simia di Alegria ta presentá: "E fiesta di kosecha!
 "Seú di Kòrsou ta e fiesta pa gradisí Dios ku nos tin un bon kosecha. Ta importante den bida pa ta agradecido pa tur lokual ku bo risibí. Nos di Sembra Alegria ta agradecido di por ta forma parti di e fiesta di kosecha akí pa 16 aña i por ta aportando na nos kultura 18 aña. E fiesta di seú tabata demostrá kon hendenan tabata yuda otro den e époka ku a bai laga nos. E yudansa ku nan tabata brinda otro tabata gratuito i di kurason.

Laga nos ban keda mantené e esensia akí. Ban uni, ban keda yuda otro i ban konopá kabuya bieu na nobo pa asina sigui mantené nos kultura i nos norma i balornan bibu! Pa nos trahe nos a usa: - Katuna ku prent di diferente koló - Katuna blou, kòrá i mòster - Tela di pita i kanchi Na pia nos tin alpargata blanku.

Nòmber di lensu: "Den goso". Esaki ta un kreatividat di e kombinashon di papilon i pal'i kuestion. Abo dama dal bo saya ku djèki, alpargata, sakandia, lensu di kabes i pasa man kue bo dakue paso ta fiesta tin. Kabayero no keda tras. Faha bo lomba bon, kue bo dashi, bo sombré di kabana i bo chikoti den bo man pasó ta kaya nos ta bai.

Awe tin motibu pa selebrá!!

Nòmber di Grupo:	Grupo HOPOSEPA
Lider di Grupo :	Surrendy Espacia
Kantidat di Partisipante:	Adulto 25
	Mucha 50
Músika :	Dj Bless

Deskripshon di Trahe marcha di Seú 2025.

Tema: TERA TA DUNA: TERA a karga simia i sòru pa kosecha!

SOLO tei pa seka tur lokual ta bèrdè riba tera!! AWA ta yobe fo'i shelu pa freska i muha tera pa simia por nase pa TERA haña fruta i berdura pa e pueblo kome.

E trahe ta konsistí di e kolónan di Awa, solo i tera!
BLOU TA SIMBOLISA AWA, HEL TA SOLO I MARON TA TERA.



Nòmber di Grupo:	Grupo Kokolishi
Lider di Grupo :	Rosemarie Cijntje
Kantidat di Partisipante:	Adulto 50
	Mucha 20
Músika :	Dj Blanken

Deskripshon di Trahe marcha di Seú 2025.

GRUPO KOKOLISHI ta bisti na un trahe di Gala. Despues di a piki un bon kosecha, awe nos ta bai selebrá

Un Fiesta di kita Sombré pa gradisí Señor pa tur loke tera a duna nos.

NOS TRAHE tin e kolónan bèrdè “lime”, hel, tela pita, kanchi blanku i un koló variá

Hende muhé tin saya ku djèki, alpargata na pia, un lensu yamá grotini di zjennie i un tas.

Hende hòmer ku nan karson i kamisa stail di un flus alpargata, sombré “wandelstok”.



Nòmber di Grupo:	Grupo Den Kosecha pa Futuro
Lider di Grupo :	Majron Maduro
Kantidat di Partisipante:	Adulto 20
	Mucha 40
Músika :	Quality Sound

Deskripshon di Trahe marcha di Seú 2025.

Diskripshon di trahe

Hende muhé ta bisti na saya ku djèki. E saya ta di e tela estampa i pruga akabá ku ròfel nan koló ros i di pruga. E parti ariba di e saya ta di pruga i e parti abou ta di e tela estampá .

E blusa ta un kombinashon di tela di pruga ,blanku i ros. A saka e blusa su krag koló blanku. Manganan tin ròfel koló blanku, man drechi e manga ta di pruga, man robes ta koló ros. Banda drechi di e blusa ta di e tela estampa , banda robes tela di pruga. E lomba di e blusa ta tela blanku i na rant di e blusa abou tin un rofel koló ros. Boton nan ta koló blanku.

E damanan su kabes ta mara ku un lensu guma, nòmber di e lensu ta : NOS TA DI FIESTA. E lensu su koló ta blanku i e kanchi na rant di e lensu ta koló blanku i oro. Na su hep e dama tin un sagandia koló blanku i na su rant e tin kanchi meskos ku e lensu di kabes. Renchi di orea rondó grandi. Na pia alpargata pretu. Den su man e dama ta karga su makutu ku e la kaba di piki su kosecha pa hinka esaki den e mangasina chikí pa bai hiba e kosecha Otrabanda den e mangasina mas grandi.

Hende hòMBER su karson ta di e tela pruga, e pianan di e karson ta saka ku un repi nan koló ros. E saku nan di karson ta di e tela estampa.

E kamisa na e banda robes e ta di tela di pruga i e banda drechi tela estampa, i den lomba tela blanku. Na banda robes di e kamisa e tin un saku di kamisa di tela di pruga. E krag di e kamisa ta di tela blanku. E manga di e kamisa na man derechi ta koló ros saka ku un repi di tela blanku, man robes ta tela blanku saka ku un repi di tela ros. E kabayeronan tin un faha pa lomba koló ros saka ku e tela estampa I un lensu na garganta (ántes: paña pa protehá boka I nanishi kontra di bagas) koló ros, boton koló blanku. Riba kabes nan tin sombré di kabana. Den man nan tin e bandera di kosecha. Arpagata na pia koló pretu.

Mei mei di e marcha e mangasina di e grupo

E trahe ta un tributo na e simplesa I ku nan ta di fiesta di gradisimentu na Dios.

Nòmber di Grupo:	Grupo Wapa Ambiente
Lider di Grupo :	Kiona Wederfoord Ursula
Kantidat di Partisipante:	Adulto 75
	Mucha 5
Músika :	Hóben na Timon

Deskripshon di Trahe marcha di Seú 2025.

Diskripshon di trahe:

KADA BLACHI KU KRESE, TA KONTA ALGU DI E SIMIA PLANTÁ.

KADA AKTITUD I KOMPORTASHON TA REDA BO ORÍGEN I EDUKASHON.

Un man, yen di simia di Wapambiente, a uni bou di ritmo melodioso di Hóben na Timon i asina forma un espektákulo kultural di nos fiesta di kosecha. Wapambiente su trahe ta simbolisá nos orígen i nos kultura ku e kolónan:

- Bèrdè oleifi
 - Oraño briante
 - Blanku pa trese speransa
 - Tela floria ku ta simbolisá alegria E para BLANKU ta duna señal di KARGADO DI SPERANSA, ku den historia bíbliko a duna señal di tera firme. Den su pik e tabatin un blachi fresku di palu di oleifi plantá, bunita BÈRDÈ OLEIFI manera su so por trese. E a bula rekto ku rumbo pa horizonte durante bahada di solo, ku un brio di shelu ORAÑO pa gui'e pa hiba e mensahe: 'KADA BLACHI KU KRESE, TA KONTA ALGU DI E SIMIA PLANTÁ.' Pa duna realse na e tres kolónan, a añadí e tela floria. Esaki ta duna bo e sintimentu di KRESEMENTU, ALEGRIA i SPERANSA. Kada miembro di WAPABIENTE ta karga un tas di pruga pa SIMIA.
 - E simia pa duna bida pa medio di nos kuminda di tera.
 - E simia di nos orígen i kultura ku ta nos norma- i balornan ku nos antepasadonan a laga atras.
- Wapambiente, un simia bon plantá!

Nòmber di Grupo:	Grupo Si no yobe lo pinga
Lider di Grupo :	Monique Gibson
Kantidat di Partisipante:	Adulto 34
	Mucha 16
Músika :	Dj Regalado

Deskripshon di Trahe marcha di Seú 2025.

Grupo Si No Yobe Lo Pinga ta presentá: Pai a lèpia dor di kansansio i e solo kayente, Mai a pasa man kue sombré drenta kunuku piki kosecha.

Den un fiesta kultural nos ta selebrá ku nos ta na bida, apesar di e mal tempu ku ta tras di lomba i ku awa no a kai suficiente pa kunuku por a ofresé suficiente kosecha. Plantando e simia di union i kompreshon nos a kosechá stimashon. Pèrmití e ranka di toleransia sin diskrepansia kibra tera i drenta kunuku pa e yobida di bendishon trese abundansia i alegria pa asina nos por selebrá i duna balor na bida. Paso bida a siña nos lora ku loke tin. Chistoso ta ku Pai a lèpia di kansansio i di e solo kayente pèrmití Mai kue sombré drenta kunuku. Nunka benta oro afó pa piki koper. Ku orguyo i plaser nos a bisti nos trahe folklórico i bin wapa den kayanan di Kòrsou.

Damsnan/Damsitanan: Un bisti estilo saya ku djèki un poko defta pa selebrá. Dòrna ku roffel, kanchi i sinta. E koló kora ta simbolisá amor pa nos kultura. E koló hel , e solo ku ta bria i duna energia.

Ku un toke di un tela kolorido di katuna yama Nansu nos ta ilustrá e alegria ku nos tin den nos kurason anto e sagandia na hip pa mara e sintura i koncha riba e tono di "e kargadó" no por keda afó. Un tas pa karga un lensu pa dep e kara i kita e lombrá. Kabayeronan karson i kamisa i un faha pa wanta e lomba. Sombré pa tapa solo i baston pa kana stret. Tur hende ta wapa ku alpargata na pia. E ku sembra ku awa na wowo lo kosecha kantando(Salmo 126:5) Gradisiendo e ser supremo.

Nòmber di Grupo:

Grupo Flornan di futuro

Lider di Grupo :

Edith Juliana

Kantidat di Partisipante:

Adulto 25

Mucha 40

Músika :

Dj Best Sound

Deskripshon di Trahe marcha di Seú 2025.

Tema: Floria kaminda bo a wòrdu planta Ku otro palabra: trata di saka e mihó fo'i bo situashon, no ta importá unda bo ta òf bou di kua sirkunstansia bo ta.

E ta stimulá bo pa mustra bo talento, keda positivo i kere den bo mes – bou di kua sirkunstansia ku presentá. E ta un yamamentu pa perseverá, adaptá i kresementu. Asina ku aunke e tera no ta perfekto, bo por sigui krusa i floria! Koló: Kòrá, blanku i bèrdè Hende muhé: Lensu di kabes: Flor di Futuro Saya: koló kòrá di patchwork (diferente motif di tela, pegá na otro) Lensu di hep: bèrdè Alpargata: kòrá Blusa: Tela di pruga Hende hòmber: Kamisa: tela di pruga, saká ku tela dam-dam Karson: koló bèrdè aseituna i na un banda di pia e tin patchwork, ku faha na sintura Alpargata: kòrá Telanan uzá: katuna

Diseñadó: Edith Fullinck i Edith Martina-Juliana Kosedó: Edith Fullinck, Ruthmila Meulens

*Den union nos ta selebrá kosecha!
Ban wap'è!*

Nòmber di Grupo:	Grupo SEREKOBİ
Lider di Grupo :	Gesilene Kerindongo
Kantidat di Partisipante:	Adulto 50
	Mucha 20
Músika :	Grupo Sembra Rèspèt kosechá vida

Deskripshon di Trahe marcha di Seú 2025.

Un historia di resilensia, pèrseveransia, i bunitesa apesar di tempu duru.

Nos a skohe datu i su flor komo inspirashon, pasobra nan ta reflehá ken nos ta i e forsa ku nos tin. Manera e datu, nos por soportá tempu difísil. Nos ta pasa tempu di sekura, nos ta enfrentá reto, i tin momentu ku tur kos rondó di nos ta mustra seku, pero meskos ku e datu nos ta keda para firme, fuerte i bon ankrá. I manera e flor blanku i ros pipa di e datu, nos no ta solamente resistí tempu difísil, pero nos ta lanta bèk i floresé. E kolónan hel, salmou i oraño vibrante ta ilustrá salida di solo den manisé hibando e mensahe ku bo por yora anochi, pero legria lo bin mainta. Difikultatnan no ta definí nos, pero sí, e manera ku nos ta superá nan. Den e tèmpo di seú aki, nos ta gradisí nos Tata, wapando ku forsa, bistí ku resilensia, kargando nos historia segun nos ta sigui floresé.



Nòmber di Grupo:

Grupo E Diferensha di Kunuku

Lider di Grupo :

Lisette Bruno/Dinaida Matrona

Kantidat di Partisipante:

Adulto 150

Mucha100

Músika :

Bena Mayo i One Flavaz Kultural

Deskripshon di Trahe marcha di Seú 2025.

Tema: No warda pa te ora Nanzi drenta den kunuku pa bo bai planta.

E hóbennan femenino su trahe ta konsistí di saya ku djèki. E saya ta kosé ku un tela di katuna koló Krèm ku un diseño di prent ku algun dicho l pintura di nanzi komo trasfondo. Na e parti abou di e saya tin falchi koló hel, oraño, l kòrá. Nan sakandia ta di e tela katuna blòki blòki kòrá i blanku .

Alpargata na pia ta koló hel .

Riba kabes nan tin un lensu di tela di katuna koló Krèm ku un diseño di prent ku algun dicho l pintura di nanzi komo trasfondo. A usa e forma firkant pa mara e lensu. Despues di a mara e lensu den e forma básiko di tres punta, ku e rant di e tela a krea diferente flor pa duna un toke di beyesa ku ta indiká e inisio di kada kosecha kual ta e flornan. Riba e tela tin diferente Dicho di Nanzi, Ta p'esei e lensu tin e nòmber di "Dicho"

E hóbennan maskulino tambe ta bistí ku nan djòmpi i nan karson. E djòmpi a keda kosé ku tela di pòpi krèm riba dje tin e tela blòkiá saká ku tela di katuna koló hel, oraño l kòrá. Nan karson ta kosé ku tela di pòpi krèm kombiná ku e tela blòkiá i e tela hel, oraño i kòrá.

Nan faha di wanta lomba ta trahá di tela di katuna koló hel, oraño i kora.

Nan dashi ta di e mes un koló di e faha Alpargata na pia ta koló hel.

Riba kabes nan tin un sombré di kabana koló krèm

Nòmber di Grupo:

Lider di Grupo :

Kantidat di Partisipante:

Músika :

Grupo Mi grupo i Mi grupo Hubenil.

Rodney Aniseto

Adulto 100

Mucha 60

Escape Band

15

A/B

Deskripshon di Trahe marcha di Seú 2025.

Deskripshon di Trahe - Mi Grupo - 2025 Tema: "Bida ta un Fiesta, Kosechá Ku Plaser" Bida ta un regalo, un oportunitat pa eksperimentá, krese i gosa. Esaki ta e esensia di e tema "Bida ta un Fiesta, Kosechá Ku Plaser", ku ta invitá e grupo pa bai mas ayá di simplemente sobreviví pero sinembargo, disfrutá i apresiá tur momentu. Kada luna, grupo ta dediká un momento pa kompartí un kos positivo ku nan a eksperensia i disidí kon nan por kosechá di esaki. Trese un elemento di impakto sosial, dor di duna sosten i esfuerso pa yuda otro ta un manera di kosechá e trankilidat i satisfakshon. Si bien e tema ta enfatisá plaser, e grupo mester krea un balansa entre sembra i kosechá pa aseguro ku tur esfuerso ta duna su frutonan.

Signifikado di e Tema Bida komo un Fiesta Un fiesta ta un momentu di union, alegría, kantá i duna nos mes libertat di ekspresá felisidat. E mesun manera, bida mester wòrdu abordo ku un espíritu positivamente, warda momentunan bon i kompartí alegría ku otro. Fiesta no ta solamente un okashon spesial, sino un manera di biba ku gratitut i alegría, sin pèrdè di bista e frutanan bon ku nos ta kosechá riba nos kaminda. Kosechá ku Plaser Kosechá ta e proseso di rekonose e trabou, esfuerso i amor ku nos a pone den nos bida i disfrutá e frutonan di esaki. Kosechá ku plaser ta nifiká ke aparse e eksitonan, e bendishon i e eksperensianan ku a formá nos.

Nòmber di Grupo:

Grupo Mi grupo i Mi grupo Hubenil.

Lider di Grupo :

Rodney Aniseto

Kantidat di Partisipante:

Adulto 100

Músika :

Mucha 60

Escape Band

15

A/B

Deskripshon di Trahe marcha di Seú 2025.

• Partisipashon aktivo: Un fiesta no ta kompletu sin partisipashon. Kada miembro di e grupo por kontribuí pa e alegria di otro. • Energia positivamente: Krea un ambiente ku ta yama mas bondat, amor i motivashon pa bai aden den e aña 2025 ku un mentalidat positivamente. Kolornan i Nan Signifikado Floral E patronchi di flor, ku tur kolónan integrá, ta simbolisá bida, diversidat i union. Ta refleho di sembra ku hopi frutonan. Hel ta simbolisá solo, energia, speransa i éksito. E kolor di alegria i di kosechá (maishi, oro). Berde Kolor di naturalesa, sembra, renovashon i balansa. Ta referí na komienso i pasenshi. Blanku Puresa, union i speransa nobo. Un página limpi pa pintá bida ku kolornan. Oraño Energia vibrante, emoshon, inspirashon i dinamismo ku ta yama pa akshon. Kabana Rais, konekshon ku tera, tradishon i fortaleza. Un homenahe na nos pasado agrikultural. Model i Material di trahe Femenino • Saya ku djèki: Estilo tradishonal ku elegansia. Saya floral, djèki bèrdè òf kabana. • Lensu pa kabes: Un toke kontraste, por ta oraño òf blanku. Maskulino • Karson ku kamisa: Inspirá den estilo di kunukero. Kamisa blanku òf bèrdè, faha oraño. • Sombré : Elementu kunukero, tradishonal. Ambos • Arpagata blanku: Tradishonal i neutral, bon pa marcha den uniformidat. Elementonan Kultural Tambú, Bari i Kachu ta resoná pa trese bida na e fiesta. Ritmo folkloriko ta despertá alegria, unidat i konekshon ku nos kultura i pueblo. Pa asina un i tur por gosa di e fiesta di Mi Grupo ora nos ta wapa bai mangazina

Nòmber di Grupo:

Grupo Zewelo Zeula i Danki p'e Fabor

Lider di Grupo :

Alex Molina

Kantidat di Partisipante:

Adulto 60

Músika :

Grupo Kompèr

16

A/B

Deskripshon di Trahe marcha di Seú 2025.

Deskripshon di trahe di grupo di seú: Zewelo Zeúla i Danki p'é Fabor

Risibí un saludo spiritual di grupo di seú Zewelo Zeúla akompañá pa su siguiente generashon grupo Danki p'é Fabor.

Awe den e fiesta di kosecha kabuya bieu ta tene man di kabuya nobo, konopá i selebrá triunfo di esfuerso, fruta di obra di man di hende di Buena fé.

Alegria renobá – hòmbènan di bon famia, bistí elegantemente na un trahe Victoriano di era Spañó; kompañá pa damanan empoderá; ku nan karkas di kurashi bou di un saya barí sintá.

E aña akí nos a para ketu na selebrashon di nos gratitut spiritual, selebrashon di nos fé, tresiendo bèk alegria skondí, den kosnan simpel di bida.

A skoke koló blanku pa simbolisá nos Bendishonanan, mientras ku Fucsia ta reflehá nos deseo di logra e kada meta ku nos nos pone nos dilanti.

Nifikashon kultural di Alegria Skondí:

Un bistí ku ta enkapsulá esensia di selebrashon di gratitut, union i vínkulo entre hende i naturalesa. Integrando elementonan di diferente influenshanan kultural i honrando nos tradishon ansestral, e bistí di Zewelo Zeúla i Danki p'é Fabor: ta sirbi komo testimonio bibu di e spiritu duradero di un komunidad ku ta prevalesé pa medio di fé. Fé ta move tur montaña.

Biba bo Fé, anto wapa ku nos den Alegria Renobá

Nòmber di Grupo:	Grupo Trank'e i Datu
Lider di Grupo :	Jessica Makaya
Kantidat di Partisipante:	Adulto 25
	Mucha 20
Músika :	Grupo Kompèr

Deskripshon di Trahe marcha di Seú 2025.

Nos traha ta un bunita representashon di nos kultura i herensia. E kolónan prinsipal ta hel i blou, ku ta reflehá e bandera di Kòrsou. E koló Hel ta simbolisá Lus, Speransa, prosperidat, mientras ku e koló blou ta simbolisá nos laman i no0s shelu dos parti esensial di nos isla.

Nos trahe tin un patron floria blou ku ta duna un sintimentu di alegria i konekshon ku naturalesa. E faha maron ta simbolisá tur kos huntu ku ta trese nos den union. Nos kier duna homenahe palunan di ántes, ku awendia no ta wòrdu usa mas, manera ántes. Ku esaki nos ta duna honor na nos palu di Kalbas. E palunan di Kalbas, ku tabata fundamental den bida di nos grandinan. Kalbas tabata wòrdu i ku ta te ainda ta uza pa traha maraka, beker, kòmchi i hasta stropi pa kuida nos salu.

E lensu riba kabes di e damanan , ku ta parti di nos trahe, ku ta representá orguyo i elegansia. E sombré di e hende hòmbèrnan ta kompleto nan aparensia s estilo i rèspèt pa e selebrashon kultural di nos Pais.

Nos trahe ta un kombinashon di koló, kultural i símbolo di nos pueblo di su tera. Un selebrashon di nos identidat, pasado i orguyo, ku ta keda na memoria di nos komunidat pa generashon tras di generashon, ku yudansa di kabuya bieu ku ta konopá na kabuya nobo.

Nòmber di Grupo:

Grupo Tamarein Uni

Lider di Grupo :

Dulcell Pinedo Moreno

Kantidat di Partisipante:

Adulto 15

Mucha 25

Músika :

Grupo Ritmiko Tamarein

Deskripshon di Trahe marcha di Seú 2025.

Grupo Tamarein Uní ta presentá artefaktonan di ántes. Kos nan di uso di ántes ku a modernisá i ku hopi hende no konosé den nan forma di antes. E artefaktonan na man manera heru di strika, washi, lampi di kerosin, tati etc. E trahe su kolornan ta oraño ku krèm saka ku kanchi maron. Oraño ta representá alegria i positivismo pa nos por sigui progresá. Krèm ta representá forsa i patriotismo. Na pia kada partisipante tin un alpargata pa nan sigui move bai dilanti den bida. Tambe kada partisipante ta kompañá e trahe ku un lensu di kabes i sombré pa mustra ku nan ta traha duru. Nos kier a deseá pueblo di Kòrsou felis marcha di seú.



Nòmber di Grupo:

Grupo Hardin Hubenil

Lider di Grupo :

Felia Comenencia

Kantidat di Partisipante:

Adulto 15

Mucha 25

Músika :

Grupo Ritmiko Tamarein

17

B

Deskripshon di Trahe marcha di Seú 2025.

Nos ta di fiesta di kosecha huntu ku Grupo Tamarein.

Nos trahe ta blusa Blanku ku saya blou ku bala bala blanku.

E blou ta e bunita di nos shelu ku ta mainta no ta gradisí Dios yama danki pa e awa sagrado di e laman blou ku for di shelu i tera nos planta i risibí di nos kosecha i p'esei nos ta baila yama Dios danki despues ku nos por sigui haña tur loke nos a kosecha.



Nòmber di Grupo:

Grupo Papilon

Lider di Grupo :

Magali Atalita

Kantidat di Partisipante:

Adulto 45

Músika :

Mucha 31

Dj Melo

Deskripshon di Trahe marcha di Seú 2025.

Awe grupo Papilon ke para ketu na algu hopi balioso ku nos tur a lanta i konosé.

NOS KASNAN DI KUNUKU.

Ki grandi ta pa duna realse na NOS KASNAN DI KUNUKU. Nos kolor básiko, E kolor oraño, ta mustra nos alegria, rikesa i ambudansia di nos kultura. Nos ta determiná pa sorru pa kada un di nos keda kòrda ku nos kasnan di kunuku ta nos herensia kultural.

Nos damanan ta lusi saya ku djèki den su elegansa, na garganta un banchi ku tbt usa hopi tempu pasá. Nan ta lensu ta representá, NOSTALGIA. Sí, awe grupo Papilon ta duna realse na nos kasnan di kunuku. Den e damasnan su man, tin unada un wairu ku nos Kòrsou ariba, pa demostra ku unda nos ta, Nos ta waya Kòrsou rònt mundu.

Nos kabayero ta defté i den nan man un bandera di Kòrsou.. Nan sombré ku ta bisa NUNKA LUBIDA RIBA MI, ta pone ku hamas nos kasnan di kunuku lo bai perdi.

*Den union nos ta selebrá kosecha!
Ban wap'è!*

ku boso Grupo Papilon.

Nòmber di Grupo:	Grupo awe pa mañan
Lider di Grupo :	Solange Bentura
Kantidat di Partisipante:	Adulto 46
	Mucha 4
Músika :	Djembe

Deskripshon di Trahe marcha di Seú 2025.

Tema: Kosechaan di Koko i Kalbas

Diskripshon di trahe:

Grupo di seú Awe pa Mañan su trahe ta representá kosechanan di koko i di kalbas.

Pasobra koko i kalbas bo por uza nan pa okashon festivo i pa medisinal. Por ehèmpel pa festivo nos por traha hopi kos di boka dushi manera bolo, tèrt, mankaron, ko'i lechi, kokada di koló i pretu, djente di kachó fo'i koko. Na kuminda Sòpito i tutu.

Medisinal nos ta traha zeta di e koko. E kalbas largu nos ta kushina e fruta. i e chiki nos ta huze pa pone riba herida i traha stropi di kalbas.

Nos pañanan ta di lakenstof i katuna kolornan bibu di e kosechanan. arpagata na nos pia, Lensu di heup i sombré na nos kabes. Kolor maron ta di nos tera tambe, bèrdé di nos naturalesa, hel di solo energia tur dia i e koló blanku ta di e pas ku nos ta harmonisá pa un ku otro den e grupo. Di e forma aki nos di Grupo Awe pa Mañan ta yama Dios danki pa e bendishon risibí wapando i selebrando 20 aña di nos grupo i di nos fiesta kultural

*Den union nos ta selebrá kosecha!
Ban wap'ó!*

Nòmber di Grupo:	Union Karapalida
Lider di Grupo :	Ludgene Balentien
Kantidat di Partisipante:	Adulto 200
	Mucha 16
Músika :	Oriri

Deskripshon di Trahe marcha di Seú 2025.

Tema: Karapalida ta bai wapa i yama Tata grandi danki pa tur Loke a risibí


Diskripshon di trahe

E trahe di hende muhe ta saya ku djeki ku tela di print di blachi mata di diferente koló (fuschia. Geel oraño berde blauw) Ku falchi nan koló fuksia i bèrdè, riba nan kabes nan lensu mará ku ta karga e nòmber di (Nan kuenta)

E pañanan ta akabá ku kanchi bèrdè i kanchi hel. Hende hòmer ku nan kamisa i karson(tela di prent di blachi di diferente koló i karson agua blau Nan faha di wanta lomba (tela di pita oraño i berde)

Nan tas di banda ku nan detayes di kabuya i sombré maron i bèrdè riba nan kabes. Asina nos ke yama Djo Danki pa tur lokual nos a risibí na Salú.

Danki pa nos trabou. Danki pa e enseñansa ku nos ta risibí. Danki pa nos famia i pa nos sigui traha huntu den Union pa nos sigui Kosecha kos bon soooo!!!



Nòmber di Grupo:

Grupo Azalea

Lider di Grupo :

Curtis Méris

Kantidat di Partisipante:

Adulto 160

Músika :

Mucha 25

Yawalú

20

A

Deskripshon di Trahe marcha di Seú 2025.

Tema: Bahada di Solo

Diskripshon di trahe

Atardi Kòrsou ta bunita, Ora solo ta Baha..... Bahada di Solo realmente ta simbolisá Soledat Pas konekshon ku naturalesa. Grupo Azalea a skohe e aña aki pa su tema di trahe : **Bahada di Solo**

Azalea kier Transformá e sentimentu di klousura di un dia, den un tempu pa nos reflehá riba e bendishon nan risibí . Siña pa apresiá i balorá esakinan. Ku bahada di solo nos ta yama Danki pa e bendishon i retonan ku ta tras di lomba i tin speransa ku e dia nobo tambe lo ta kargá ku bendishon nan. Ku nos konosementu di awe lo hasi mañan mas mihó ku ayera .

E kolónan di e trahe ta símbolo di vibrashon positivo.

E olanan den e saya ta simbolisá forsa renobá, moveshon, i kambio konstante den nos proseso di bida.

Blanku ta símbolo di Pas ku ta karga nos, pa kada dia nos ta un mihó vershon di nos mes.

Di e forma aki nos ta gradisí Shon Grandi i sigui traha riba un mihó futuro.

Meta di grupo Azalea ta pa:

- Sigui aportá na kultura di Kòrsou
- Mantené EHerensia kultural aki bibu
- Formashon Kultural : Eduká grandi i chikitu riba aspektonan kultural spiritual ku ta guia nos bida.

Un pueblo eduká ta konsiente ku banda di gosa, nos ta enrikesé nos konosementu i tá konsiente di e difrente elementonan sosial i kultural ku ta mara nos huntu pa hasi nos un pueblo di Fe di Amor, di Pas i Union; kual ta balornan importante ku por kondusí henter nos Pais na Pas trankilidat i Felisidat.

Nòmber di Grupo:

Grupo Triunfo di Sablika

Lider di Grupo :

Marystella (Lady Ella) Bernabela

Kantidat di Partisipante:

Adulto 40

Mucha 20

Músika :

Grupo Rítmiko Sablika

20

B

Deskripshon di Trahe marcha di Seú 2025.

Tema: Laraha: **E fruta di oro**

Diskripshon di trahe:

Selebrando 1 di e kosechanan mas grandi na Kòrsou Un fruta ku a wòrdu transportá for di aña 1527 for di Spaña i di un manera òf otro a haña un otro propósito E palu di fruta akí a kambia di un koló oraño bibu pa un laraha bèrdè. Despues di tempu a diskubrí ku e kaskanan di e laraha ta basta aromátiko i den un eksperimento ku ekstrakto di e kaskanan akí a yega na e kreashon di Curaçao Liquer.

E Triunfo di Sablika den kolaborashon ku Senior&co ta presentá **E FRUTA DI ORO mihó konosí komo The Golden orange of Curaçao.**

Parti ariba di e mucha muhé nan boso por mira koló bèrdè esei ta pará pa e koló real di e fruta laraha. 'off white' ta pará pa e proseso ku e fruta aki ta pasa'den. Promé ku e kreashon haña koló e likido puru ta blanku.

E blou ta pará pa e produkto final ku e ta blue Curaçao.

E oro ta pará pa e kalidat prestigioso ku e fruta aki tin.

E pèrlanan ta pa enfatisá ku e fruta aki ta unu di hopi balor riba nos isla.

E diseño zik i zak tantu na e manga di skouder komo e saya ku djèki ta nifiká e proseso ku fruta aki ta pasa aden i pa na final di un bon produkto. E hende hòmber tin un blusa off white ku detayesnan blou i bèrdè. Na karson tin un pia bèrdè ku ta nifiká e palu di laraha riba su mes i e otro pia (blanku ku blou) ta simbolisá e proseso di e liquer. **E palu di laraha ta nos Hereo.**

Nòmber di Grupo:	Grupo Labizjan
Lider di Grupo :	Geraldine Constancia
Kantidat di Partisipante:	Adulto 45
	Mucha 20
Músika :	Músika: Caramileño

Deskripshon di Trahe marcha di Seú 2025.

Tema: Sin awa no tin kosecha i sin kosecha no tin kuminda

Diskripshon di trahe:

Sin awa no tin kosecha i sin kosecha no tin kuminda. Awa, fuente di bida kresementu i bendishon pa kosecha. Nos di grupo Labizjan kier a enfatisá riba e importansia di awa i kon e tabata wòrdu kargá pa hiba kunuku. Awa ta fundamental den nos bida. Karga awa, tabata trabou ku hòmber i muhénan tabata hasi, Trabou duru ku a krea un laso fuerte entre hende i naturalesa. E kombinashon di koló ku ta wòrdu usa pa e trahe, no tin solamente relashon ku e tema, sino tin un nifikashon mas profundo. Nos a skohe e koló Maron: e koló di tera, di forsa i di komunidat hel pampuna: un koló ku ta representá solo, speransa i energia Oraño: ta representá vitalidat, e forsa nesesario pa soport tur trabou duru E tela ku patronchi di gota : ta referí na e awa. Pero ta referí tambe na sodó, esfuerso i lágrima di trahadó, pero ku a sigui resistí.

Trahe di hende muhé ta konsisti di: Saya ku djèki . Djèki tela patronchi di awa, falchi maron ku ròfel abou. nan saya ta kuater dek di ròfel maron, hel pampuna, oraño i patronchi di gota i sankandia maron. Arpagata na pia. E hende muhé tin un lensu ku su rudia pa karga bleki di awa riba su kabes . Esaki ta mustra balansa i resistensia

Trahe di hende hòmber ta konsisti di: Kamisa ku patronchi di gota. Un braga maron $\frac{3}{4}$ saká ku patronchi di gota. Un sombré i arpagata na pia. Hende Hòmber tin garoti na man i su bleki di karga awa na kustia ten'é, ku ta representá forsa i sosten.

Nòmber di Grupo:	Grupo Wapa pa nos bai
Lider di Grupo :	Jessy Waal Casper
Kantidat di Partisipante:	Adulto 36
	Mucha 32
Músika :	Los Parenderos

Deskripshon di Trahe marcha di Seú 2025.

Tema: Planta ku Fé, kosechá ku amor.

Diskripshon di trahe:

Nos ta para ketu riba e fruta di granatapel ku por mira riba nos trahe. Granatapel nos ta planta i kosechá, paso e tin hopi vitamina den dje. E tin vitamina C i E. Super bon pa nos bista i tambe pa rosea.

E trahe di hende muhé ta konsistí di saya ku djèki ku e kolornan ku ta resaltá ku ta bèrdè, hel, oraño i blanku. Kolornan suave ku ta huza pa seú. Berde di speransa i di blachi. Hel i oraño ta kolor di e kaska di granatapel. Na sintura tin nan sangandia di manera ku ora ta traha den kunuku i ku soda, ta pasa man na frenta i pas'é na e sangandia i asina ora e susha, ta lab'é pa manisé por bolbe husé. E alpagata ta blanku.

Nos lensu ta mará estilo: "Bo kuenta". Kiko ku bo papia of bisa, nos no ta wòri ku nada. Nos ta sigui gosa bai di nos kultura. Riba dje, na banda, tin un rudia i tambe un makutu chikitu.

Pa e hende hòmbènan tin nan karson ku kamisá. Tambe tin su band di wanta lomba. Dashi poné na nan garganta. I e sombré pa wanta pa solo. E alpagata ta bèrdè.

Ban wap'é!

Nòmber di Grupo:	Grupo Paniweri
Lider di Grupo :	Raychel Sambo
Kantidat di Partisipante:	Adulto 326
	Mucha 58
Músika :	JC and Friends

Deskripshon di Trahe marcha di Seú 2025.

Tema: Maña di Maishi

Diskripshon di trahe:

Paniweri ta presentá Maña di maishi. Maishi ta mas ku un simia; ta un símbulo di bida i kultura. Di tempo di nos antepasado, nos a desaroyá “Maña di Maishí”—un konhuntó di téknika i sabiduria pa traha, konsumí i preservá maishi.

Nos agrikultornan a sembra, kosechá i transformá maishi den kuminda riku i nutrisioso ku ta forma parti di nos identidat. E koló hel ta dominá interkambiando ku e maron i blanku pa duna realse na e plantashon di maishi ku Paniweri ta presentá.

Koló di positivismo, loyalidat, energia i felisidat Paniweri e kargadó ta na kaminda pa kontagia bo ku nan vibrashon di legria.

Trahe maskulino E ser maskulino su trahe ta konsistí di su kamisa manga largu i karson te na ènkel, faha pa wanta lomba, sombré di kabana i na pia su alpagata.

Trahe femenino E ser femenino su trahe ta konsistí di su saya ku djèki, lensu di kabes i su alpagata. Den sekshon limita e saya ta diferensha di saya bari sinta òf saya hanchi.

Diseñadó: Emerson Cordilia i Sorviensky Bonevacia

Nòmber di Grupo:	Grupo Kibrahacha
Lider di Grupo :	Selasa Engelhardt-Porier
Kantidat di Partisipante:	Adulto 35
	Mucha 15
Músika :	DJ Karlito

Deskripshon di Trahe marcha di Seú 2025.

Tema: Ami ta un trahadó di e kosecha.

Diskripshon di trahe:

Saka for mateo 9.37. Trahadó ta poko i tin hopi kosecha e aña aki.

P'esei nos di grupo kibrahacha tambe ta forma parti di e fiesta di kosecha.



Nòmber di Grupo:	Grupo Amor pa nos Kosecha
Lider di Grupo :	Milouska Tremus
Kantidat di Partisipante:	Adulto 50
	Mucha 20
Músika :	Daiquiri Band

Deskripshon di Trahe marcha di Seú 2025.

Tema: Konmemorashon i Honor na e muhé

Diskripshon di trahe:

Grupo ‘Amor pa nos Kosecha’ ta selebrá i konmemorá nos muhé nan yu di tera.

Dunando honor i realse na e muhé di orígen trahadó. Nos ta para ketu na e trabou, esfuerso i logronan. Paso trabou duru nunca no a mata p’esei awe despues di hopi esfuerso muhé nan ta subi kaya pa selebrá nan logro. Amor pa nos kosecha ta pidi aplousu i apoyo pa e muhé nan di koló ku durante aña nan a sa di karga nos Pais, nos kultura i nos historia den tur rango i asta internashonalisé.

P’esei e trahe aki ta duna honor na nos hende muhé nan kulturista manera: Mosa Nena, Cenaida Van Dinter, Doña Elia Isenia, Sablika, Rina Penso, Nidia Ecury i en pas deskanse Dina Veeris. I sin kita kredito for di nos hende muhé nan den e mundu beyesa. Meskos nos hende muhé nan deportista, kantante, bailarina i minister nan tur ku a i ta trahando na honor i bienestar di kresementu di nos Pais.

Nos hende hòmber nan tambe ta sali kas pa karga e hende muhé. E trahe ta un blusa kaminda nos ta mira e muhé di koló aden i tambe e saya ku ta simbolisá ku éksito i logro ta un kaminda pa kana. E koló hel ku ta resaltá ta simbolisá e energia positivo buta tras di kada trabou.

E diferente koló nan ta pa indiká ku ta kla pa selebrá e logro i triunfonan di nos muhé nan.

Nos di grupo “Amor pa nos kosecha” kier sera poniendo énfasis i kòrdando tur hende ku mama di nos Salvador ta un hende muhé. P’esei ken por biba sin e ser muhééééé! Nòmber di e lensu ta Kontentu.

Nòmber di Grupo:

Grupo HE CHU CHU

Lider di Grupo :

Adulto 125/mucha 30

Kantidat di Partisipante:

Adulto 75

Músika :

Mcuha 10

He Chuchcu Grik

He Chuchu VIP Tribu

Deskripshon di Trahe marcha di Seú 2025.

Grupo seú He Chu Chu ta presentá “AWA KU PARA KETU TA BOMBA”

Kultura mester keda bibu i sigui krese.

Pesei mes nos mester gatia pa kana.

Mester subi pa yega.

Mester traha pa logra.

Nos no por sinta mas, ta ideanan huntu ta yega na union pa krea i logra meta nan grandi.

Si bo no puntra bo no ta sa.

P’esei Grupo seú He Chu Chu a pone kabes huntu pa ban selebrá logronan grandi.

Pidiendo shon grandi bendishon. Nos ta subi kaya pa lusi i tene nos kultura bibu i sigui engrandese kultura di Kòrsou.

“Awa ku para ketu ta bomba”

E diferente kolónan di blou ta reflehá nos awa i e blanku ta e pas ku Kòrsou mester keda traha p’e.

Trahe ta diseñá pa Eugenie Florentina i kosé pa EF Creation.

Danki na tur Spònsernan ku a Kere i Sostené Seú 2025



MINISTERIO DI
**ENSEÑANSA, SIENSIA,
KULTURA I DEPORTE**

